

Huet

I.

Quant voi l'erbe respandre
Par ces prez et renverdir,
Lors vueil a chanter entendre,
Que ne m'en puis plus tenir;
Qu'Amors me fait ce entreprendre
Qu'est mout grief a maintenir;
Amer sens guerredon rendre
Ne puet mie cuers soffrir,
Ne longuement maintenir,
Sens confort ou sens merir.

II.

Ja ne me grevast l'atendre
S'au loing me vousist oïr;
Mes por c'est ma joie mendre,
Que je redout le faillir.
La fin d'amor vueil aprendre
Que j'en sai jusqu'au morir;
Ne nuns ne me puet defendre
A amer ou a haïr;
Si me plest a maintenir
Amor, qu'el me puet merir.

III.

Dame, sor totes amée
De loial cuer sens trichier,
Belle et blonde et acemée,
Mes ne vos sai losengier;
Loin sui de vostre contrée,
Ce me fait plus esmaier;
Por tant est l'amors doublée,
Dont ne vos os aresnier,
Tant vos dot a corrocier,
Car ce ne m'avroit mestier.

IV.

N'ai pas la joie obliée
Dou dous termine premier
Que l'amor me fu donnée,
Dame, que toz jors requier;
Mais tost me refu vehée,

Quant vos plot a essayer
Coment ire est tost montée
La ou joie est a dangier.
Si ne m'en os corrocier,
Que de servir ai mestier.

V.
Amor a grant seignorie
Sor moi, bien le m'a montré;
Por ce nel retrai je mie
Qu'a li n'aie mon pensé;
Et se ma dame m'oblie,
Tant li cri merci, por Dé,
Qu'ele reconoisce et die
Que l'ai loiaument amé;
Adonc li soit pardonné
Se je moroie por lé.

VI.
Felon losengier d'envie
Meint home avront grevé;
Mes pou vaut lor felonie
Vers la debonairété
Celi qui en sa baillie
A si mon cuer atorné.
Haï, fause gent haïe!
Car fust de vos a mon gré!
Ne vos seroit pardonné,
Par la foi que je doi Dé.

VII.
Gasçoz qui tant a amé
Amera tout son aé.
Desirranment si pri Dé
Qu'endroit li n'i ait fausé.

- letto 501 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-30>